

Sin via, enta maun in sac da rumien

Sin via tier la dismessa da rumians, ha in giuvenil sin in balcon d'ina habitaziun da vacanzas clamau tier mei, curaschus e fortificaus cun "in tec" alcohol: "Jeu hai cheu era aunc in sac plein rumians". Jeu hai mussau vi tier il container, sminont ch'el sappi gia daditg nua che tal sesanfli.

Igl ei buca jester per mei, ch'ins fa legher davart la dismessa da rumians. Tgi muossa bugen siu agen rumien ni lai far attents ils auters sin tal? E tuttina, negin sa snegar ch'el produceschi buca rumians.

Ei dat ina part da persunas che sedattan dapli breigia da producir schi pauc sco mo pusseivel rumians. Perencunter eis ei ad auters tuttina, la fin finala ston els gie buca pitir sut lur curdems.

E tuttina ei il basegns cheu per tuts carstgauns da dismetter mintgatun il rumien; da sedeliberar digl agen rumien. Per bien cletg dat ei per gliez stabiliments per dismetter ni barschar ils rumians.


(Ins sa leger il text sura menziunau aunc inagada, remplazzar denton il plaid „rumians“ adina cun „puccau“).

Transformau ei il maletg „container“ per dismetter ils rumians, nies bien e vegl confessiunal. Leu savein „barschar“ tut quei ch'ei buca stau endretg avon il Segner ed avon il concarstgaun. Barschar e reconciliar ei denton buca gratuit. Sch'ins vul viver endretg la reconciliaziun, lu ston ins prender peda. Peda per esser cunscients da quei ch'ei malgarteigiau. Peda per anflar vias da returnar e reconciliar, lu pudein nus sesarver per la carezia reconcilionta da Diu.

La devoziun da penetienza duei survir ad ina nova orientaziun, d'ir en sesez, per silsuenter puder continuar la via, nutri digl amureivel agid da Diu.

Ei buca il desideri, d'adina puspei sereconciliar cun sesez, cun l'atgna historia, cun tut il malgarteigiau, cun tut il buca contonschiu, cun ils agens cunfins, cun l'atgna cuolpa, cun il desideri fundamental d'affecziun en mintga carstgaun, ei quei buca sco la dismessa da nos rumians da nies percasa?

Il liug ed il process dalla purificaziun ei beinsavens buca sempels e pretenda gronda stenta persunala. Il ver autur ei denton Diu: Tut quei ch'il carstgaun sa far, ei da „far amogna“ d'esser aviarts per igl operar divin.



Nus mein encunter Pastgas

Ella vigelgia da Pastgas purtein nus en baselgia il tscheri pascal e cantein: Glisch da Cristus. Lu vegn quei ad esser in act liturgic. Quel survegn lu senn ed ei verdeivels, sch' el serealisescha era el mintgadi. Dieus ha tarmess siu Fegl, sia glisch el mund. El drova mo in liug nua ch'el sa glischar.

Aschia ei la cardientscha morta senza ovras. Nus essan sias creatiras, scaffidas en Cristus Jesus, cun la finamira da far bunas ovras. Crer en Cristus - haver fidonza en el - vul dir: Viver en siu Spért, che la glisch seigi en quest mund pli ferma che la stgiradetgna. Ina tala experientscha inspironta e deliberonta giavischel a vus duront quei temps pascal.

Informaziuns per Laax

Communiun dils malsauns:

Mesjamna, ils 13-04-2011 suentermiezdi

Radunonza generala dalla Pleiv

Cordial invit alla radunonza generala dalla Pleiv che ha liug venderdis, ils 8 d'avrel 2011 allas 20.00 uras ella Sentupada.

Invit alla tschavera da suppa

Dumengia da Palmas, ils 17 d'avrel 2011, suenter il survetsch divin, ein tuts parochians e hosps envidai cordialmein alla tschavera da suppa ell'aula Grava. Nus selegrein da sentupar leu cun vus tuts e da star empau da cumpignia. La contribuziun per la suppa, sco era per il caffè e la petta, che stattan a disposiziun da cumprar, van en favur dall'acziun ecumena "Unfrenda da Cureisma" e "Paun per tuts".

In grond Dieus paghi a tuttas gidontras e tuts gidonters che preparan e segidan tier quell'acziun.

Devoziun dallas mummas e lur affons

Mesjamna, ils 20 d'avrel 2011, allas 16.00h en baselgia ein tuttas mummas e lur affons cordialmein envidadas alla devoziun cun il tema Pastgas. Il plaid "Pastgas" animescha per plascher e legria; pia, selegrei ensemen cun voss'affons sin quella devoziun.

Gratulaziun

Nus gratulein da cor ad *Anna Maria Coray-Camenisch* che festivescha ils 6 d'avrel 2011 siu 80-avel natalezi. In sincer e ressentiu Dieus paghi per tut quei che Ti has prestau en favur da nossa pleiv e vischnaunca. Nus giavischein vinavon buna sanadad, bia bi e bien, la benedicziun dil Tutpussent ed in legreivel di da fiasta.

Informaziuns per Falera

Communiun dils malsauns:

Venderdis, ils 01-04-2011 suentermiezdi
Gievgia, ils 14-04-2011 suentermiezdi

Vendita da rosas

per il dretg sin nutriment dall'acziun da Cureisma: Sonda, ils 2 d'avrel 2011 naven las 08.30h avon il VOLG. Entras la cumpra da quellas rosas tschenteis vus in'enzenna per il commerci global che respecta ils dretgs humans, che segida da sminuir fom e pupira.

Invit a nos seniors:

Messa cun il sacrament dall'uncziun venderdis, ils 6 d'avrel 2011 allas 13.30h, festivein nus il survetsch divin cun il s. sacrament dall'uncziun. L'uncziun vul porscher forza, confiart e speranza ella veta da mintga di, mo oravontut perseveronza en dis da malsogna e maldispostadad.

Suenter la liturgia envida l'Uniun da dunnas da star da cumpignia tier in pushegn ella Fermata. Allas dunnas engraziein cordialmein per quei survetsch.

Invit alla tschavera da suppa

Dumengia, ils 10 d'avrel 2011 ein tuts parochians sco era hosps envidai cordialmein alla tschavera da suppa ella Fermata. Il recav dalla tschavera sco era dalla vendita dil mèl d'aviuls dalla Caritas va en favur dall'acziun «Unfrenda da Cureisma» e «Paun per tuts». – In grond Dieus paghi a tuttas gidontras e tuts gidonters che segidan tier quell'acziun.

Devoziun dallas mummas e lur affons

Mardis, ils 19 d'avrel 2011, allas 16.00h ein tuttas mummas e lur affons cordialmein envidadas alla devoziun cul tema Pastgas. Gia il plaid «Pastgas» animescha per plascher e legria. Selegrei ensemen cun voss'affons sin quella devoziun.